

SA BORRONCHERA

Amentos arcanos de paghe,
 pertunghen, che fritzas de lughe,
 sa neula 'e sos seculos
 ponendemi in ossos su frittu
 e in coro unu dubbiu:
 che iscapulariu 'e tiria.
 Presonera de un'antigu bisu,
 s'anima, iscusserta,
 un'urtima 'orta mirat
 sos astros chi lughen in artu.
 Manna!... Semper prus manna
 cumparit s'impotessia
 cando sa borronchera 'essit da-e mare
 minettande sos primos fritos de sa vida.

Aranzolos nieddos,
 han tessiu telas d'irmentigu
 po prender sos bolos sublimes
 de milli e milli poetas.
 In sa corona 'e su Re
 hat fattu su nidu corvai;
 nen prus ghattat pore
 su casteddu torrad'a muridina.
 Si perdet s'ispera!
 S'apussiat sa zertesa,
 in sa trubula paùle de s'ispatziu-tempus!

Tic... Tac... Tic... Tac...
 Su rellozu 'e s'eternidade
 sighit sa cantilena
 de passiones ardentes e frores de chisina...
 passos istracos,
 cattigan sa coa 'e s'impredadu
 fattu 'e dimandas a su 'entu.
 In segus, sas umbras de su mundu,
 perden forma e colore.
 Ischintiddas de chelu,
 bestin unu mamentu de lugore
 sas nues murinattas
 arrennoande sa durche paristoria
 chi est s'urtim'incunza
 de sas fadigas umanas.

ORIONE

*Arcani ricordi di pace, / forano, come dardi di luce, / la nebbia dei secoli /
 gelandomi le ossa / e lasciandomi un dubbio nel cuore: / come uno scapolare di
 spine. / Prigioniera d'un atavico sogno, / l'anima, sgomenta, / contempla
 un'ultima volta / le stelle che brillano in alto. / Grande!... Sempre più grande /
 appare l'impotenza / quando Orione spunta dal mare / nunzio dei primi freddi
 della vita.*

*Ragni tenebrosi, / han tessuto tele d'oblio / sui voli sublimi / di mille e mille poeti.
 / Nella corona del Re / un corvo ha fatto il nido; / né più terrorizza / la fortezza
 ridotta in macerie. / Si perde la speranza! / Sprofonda la certezza, / nella torbida
 palude spazio-tempo!*

*Tic... Tac... Tic... Tac... / l'orologio dell'eternità / continua la sua nenia / di
 ardenti passioni e fiori di cenere. / Passi ormai stanchi, / calpestando la fine del
 selciato / fatto di domande senza risposta. / Dietro, le ombre del mondo, /
 svaniscono nel nulla. / Scintille di cielo, / di splendore addobbano un istante / le
 nubi grigiastre / rinnovando la dolce leggenda / ultima ricompensa / delle umane
 fatiche.*